

按粵疏稿

軍政劾將官疏

題爲糾劾不職將官以肅軍政五年考臣布按二
察院勘劄准兵部咨稱各都司衛所軍政官員
萬曆四十三年例該五年考選相應題

請通行各處總督撫按官將所屬大小將領等官用
心詢訪如有不職等項會同劾

奏議斥等因題奉

聖旨是欽此欽遵移咨備劄前來已經案行布按二
司守巡等道從公博訪隨據各報前來該臣會

同總督兩廣軍務兼巡撫廣東地方兵部右侍郎兼都察院右僉都御史今陞南京刑部尚書
候代張  覆加查覈訪得分守西山管叅將
事副總兵趙文憲身居虎穴腹乏龍韜病骨支
離旣鮮據鞍之力貪心勃發轉爲營橐之謀黎
把總剝兵被革者以私人而收之軍前能無尋
轍林中軍斂衆奉上者因扣剋而反加委任祇
博怨聲將不養士溺其職矣而家僮隸卒掛名
支糧試問朱成張勝等若干名誰非其僕役乎

此飽誰之吻也士不習技亦已疎矣而火藥散
匠大半虛冒試問何漢才劉奇等若干名其人
竟安在乎此果誰之腹也點選征兵不分道里
遠近遲到者把總區志績逐名科斂蓋一百二
十餘名得銀百餘兩矣何以杜目兵之口預借
月糧不令塘兵早知偶後者書手朱禮逐名扣
除蓋本年五六月所得亦不貲矣何以免搶
糧之謠需索無厭則雖征黎之土狼亦每土州
勒銀三十兩致狼衆激怒幾以督令官王勝殉

也賄賂公行則雖征黎之藥弩手亦得頭領郭
鸞銀一百兩及各役已散竟以其子爲旗牌官
償也病中廢事止宜自憾而每營取免查銀二
十兩誰則是之病中散糧方懼弗親而每營取
羨餘銀五兩誰其甘之志非決去也乃以乞歸
爲名每營折長夫十二兩索杠銀十兩言旋何
日不亦大可羞與身在地方也乃舁生祠自表
每營派公費五十兩木料若干株祠宇見在不
亦更可異與夫西山固羅旁之孽而戡定之餘

也頃者黃貴一呼千人響應夫豈無事之地而
以偃蹇牀褥之夫糜軍需而虛戎伍其何以徵
桑土備陰雨哉此一臣者壯志久銷于二豎原
無枕戈躍馬之能誅求已徧于三軍豈勝腹心
干城之任所當革任回籍閒任者也分守潤洲
遊擊將軍陸韜年華已邁志氣寔衰禁池而反
以鬻池禦盜而適以資盜如龍門牙山二寨兵
八百餘名每名月扣三分以任內計之幾一千
一百兩矣何龍陳賢等可問也如左右中三部

兵七百餘名每名月扣三分以任內計之亦幾千兩矣張德黃平等可問也頻年查船則不論有無號記而每歲得銀五百餘兩夫非王芳陳經等收送乎頻年查寨亦不論有無盜螺而每票索銀二三十兩夫非蘇漢許益等斂取乎賣池與巨惡魏濱洋等任其造船恣取而每月二水取珠八兩是身爲戎首也賣海與附近居民鄭元陽等每家出銀三錢而總計取銀三百兩是與盜同情也西四總獲竹簍九箇乃不正法

而差王芳索銀三十兩仍發鄉老鄭元賓領回
何以杜其竊發濱海中獲灰斗船一隻亦不窮
治而縱洪廷實銀三十兩仍聽買主林三出海
能無教之侵池南哨百戶陳懋隆果有疎虞卽
宜聲言其罪而差哨官李一魁索銀六十兩此
何說也息安堡鎮撫金應麟果係逸賊卽宜明
正其辜而差哨官楊鳳勒銀三十兩又何名也
攫取及于漁船則兩埠九十餘名得銀三百六
十餘兩皆陳効良收進而此後犯海誰禁哉科

派及于塞官則八寨每季各銀四兩計一歲百有餘兩皆陳奇德索取而此後玩法誰問哉況其虛冒兵糧如劉勝葉奇鍾惟權等多至一十八名而故縱宵小如洪廷王芳楊清輩人稱一衙三虎牙爪得肆搏噬橫行操趣旣汙隄防盡潰沿海一帶與賊共之而蹶蹶周道行李且爲不通誰之罪也此一臣者才原庸懦旣不能振積習之玩愒而壯神氣于金湯守復霑濡反以啓羣姦之窺伺而釀禍機于珠海所當革任回

衛差操者也伏乞

勅下兵部再加查訪如果臣等所言不謬將趙文憲
革任回籍閒住陸韜革任回衛差操庶武弁知
所儆惕而戎政可以肅清矣緣係糾劾不職將
官以肅軍政以勵武臣事理未敢擅便爲此具
本專差承差郭樑齎捧謹題請

旨奉

聖旨兵部知道

此乃一頁空白紙，其上印有極淡的垂直文字，係因紙張透印所致。文字內容難以辨識，但可見其為繁體中文。右側邊緣有一條粗黑線，可能為裝訂或掃描邊緣。

嶺西道休致疏

題爲病勢十分危篤萬難供職懇求代

題放歸田里以遂首丘以免痼曠事據按察司分

巡嶺西道副使顧起淹呈稱職于七八月間因

患病危迫具文呈請乞歸蒙兩院批詳勅留適

蒙本院巡歷肇慶因是勉強以完巡事至十月

初一日忽遇狂風驟起遂至癱厥手足拘攣已

成廢疾之人昔之聲不能亮者今已不復能出

矣昔之書不能工者今已不復能書矣切思本

道設當重鎮兼之帶管分守事務頗繁卽欲勉竭愚慮以圖稱塞但神思日耗于痠痺政務深虞于曠廢犬馬之齒日長首丘之念實殷乞憫病勢阽危憐職求去非假卽往致仕等因該臣詳批該道料理精密神氣有餘展下督院移代境上守道任期未聞重鎮彈壓之任恐難遽弛也風痰小恙不妨調攝視事以副地方倚賴繳續又據本官呈稱職因形神疲困五官幾廢不得已再陳乞歸蒙批前情職豈有曾無心思惟

稱塞青皇第痼疾已深疲憊日甚豈惟指臂麻木抑且頭目昏暈似此廢人安能力疾從事再懇乞憐苦情非有一毫矯飾等因臣復詳批該道情詞甚懇豈不深諒第二道責任至重地方空虛無可委託卽該道爲地方計自有難于弛擔者暫輟簿書靜攝旬日自當勿藥不必萌歸念也繳去後隨又據本官呈稱職痼病日深道務已廢屢懇放歸未蒙矜允顧職自兩旬以來言不成言字不成字邇且飲食少進眩暈時作

視息僅存蓋年齒已衰藥石罔效偃仰一榻已
成廢人尚安能復如前日再效勞力今惟決去
庶可追責而此身存亡尚未可必伏乞代

題容職一面將二道印務送司另委攝署等因該
臣看得本官患病告休情詞懇切據詳不啻再
三恐非得已隨批按察司會同布政司查議今
據該司經歷司呈蒙本司帖文該本司署印提
學僉事張邦翼會同布政司掌印右布政使董
肇胤看得分巡嶺西道副使顧起淹珪璋粹品

鎖鑰長才閱歷久而中外揚休操持峻而屬寮
象表權璫播毒叱咤挫彼鋒芒河泊不仁拮据
厝民衽席政績盈部簷之頌勤勞壯幕府之猷
久任庶殫猷爲優擢應聞旦暮忽爾疾疢侵尋
且云藥餌罔效本院之勉慰至再該道之陳乞
愈堅迫切已見乎情挽留終不可強諒非獲已
似應俯從請乞代

題准放本官回籍調理等因具呈前來該臣會同
總督兩廣軍務兼巡撫廣東地方兵部右侍郎

兼都察院右僉都御史今陞南京刑部尚書候

代張

看得廣東按察司分巡嶺西道副使

顧起淹嶙峋勁骨凜冽貞操志愈挫而愈堅事
彌經而彌練才華璀璨少年英發不如法律精
通能吏講求未逮三尺不私左右而屬官之懲
汰尤嚴一腔常注士民而災沴之撫循更切方
期久任快覩遠猷屬以痰恙相侵遂致歸心莫
遏雖勉留至再慰地方攀臥之思而勇退宜從
成臣子出處之義伏乞